

## TVET setaraf lulusan universiti

**KUALA NERUS** - Pelajar lepasan Latihan Pendidikan Teknikal dan Vokasional (TVET) kini mempunyai peluang sama rata dengan graduan universiti bagi merentas peluang pekerjaan dalam pelbagai industri di negara ini.

Sehubungan itu, Pelajar lepasan Sijil Pelajaran Malaysia (SPM) dan Sijil Tinggi Persekolahan Malaysia (STPM) diingatkan agar tidak terlalu menetapkan sasaran untuk melanjutkan pengajian di universiti semata-mata kerana bidang kemahiran kini telah setanding.

Menyertai Pendidikan Tinggi, Datuk Seri Idris Jusoh berkata, bidang kemahiran atau teknikal ketika ini semakin menjadi pilihan pe-

lajar.

"Sekarang ini peluang pendidikan bukan sahaja daripada universiti tetapi TVET seperti politeknik juga mempunyai pengiktirafan yang sama."

"Jadi pelajar (lepasan SPM dan STPM) jangan tetapkan untuk masuk akademik (universiti) kerana peluang TVET telah sebaik peluang akademik," katanya.

Beliau berkata demikian pada sidang media sebaik selesai menyempurnakan perasmian Karnival Pendidikan Tinggi Negara (KPTN) 2018 Peringkat Negeri Terengganu di Universiti Malaysia Terengganu (UMT) di sini, semalam.

Hadir sama, Naib Canselor UMT, Prof Datuk Dr

Nor Aieni Mokhtar, Naib Canselor Universiti Sultan Zainal Abidin (UniSZA), Prof Datuk Dr Ahmad Zubadi A. Latif dan wakil-wakil universiti lain seluruh negara.

Mengulas mengenai karnival yang merupakan 'flagship' Kementerian Pendidikan Tinggi (KPT) itu, Idris memberitahu UMT merupakan lokasi ke 13 daripada keseluruhan 16 lokasi seluruh negara.

Promosi besar-besaran yang dibuat di bawah satu bumbung itu bertujuan untuk menyebar luas mengenai peluang pendidikan tinggi yang ditawarkan oleh Universiti Awam (UA), Politeknik, Kolej Komuniti, Institusi Latihan Kemahiran Awam (ILKA), IPTS dan institusi lain.



Idris (depan) bergambar bersama tetamu kenamaan dan peserta selepas merasmikan karnival itu.